



Gabinete Wever - Croes II

# ISLAONLINE

Noticia di Gobierno

2023

Diahuebs 1 Juni 2023

Email: [IslaOnline@gobierno.aw](mailto:IslaOnline@gobierno.aw) Tel: 528-4952

**2023**  
**AÑA DI**



**UNION**  
**Y POSITIVISMO!**



@IslaOnline2023





## **FRONTERA MARITIMO CU VENEZUELA TA HABRI**

### **E prome barco di fruta y berdura lo yega Aruba di Venezuela dialuna awo**

Desde 1 di Mei 2023, Gobierno di Aruba a habri e frontera maritimo cu Venezuela y dialuna awor, dia 5 di Juni, e prome barco lo yega Aruba cu 15 ton di fruta, berdura y otro mercancia. Cu esaki ta habri e posibilidad di por importa fruta y berdura y otro mercancianan na prijsnan hopi mas barata for di Venezuela yudando asina pa rebaha costo di bida.

Prome Minister Evelyn Wever-Croes a indica di ta consciente cu e proceso aki a dura un poco largo pero ta motibo cu Gobierno a enfoca na bin cu un sistema cu ta traha den bienestar di Aruba y cu ta safe. Pa seguridad a pone varios condicionnan riba mesa, cu den pasado a traha positivamente pa pais Aruba.

Gobierno ta spera cu e mesun condicionnan aki lo traha un biaha mas yudando asina pa combati e costo di bida halto cu tin na Aruba actualmente.

Lamentablemente na Aruba mayoria producto ta importa y cu esaki ta bin e inflacion tambe. Pa e motibo aki ta importante pa sigui busca alternativanan pa importa productonan mas barata via trafico maritimo. Pa loke ta trata trafico aereo, esaki ainda ta satus quo. Gobierno ta trahando riba un analysis di e riesgonan pa mira kico ta locual cu mester tuma luga, den cierto casonan mester cambia ley of proceduranan prome cu por yega asina leu na habri e frontera aereo.



## Prome Minister Evelyn Wever-Croes: **GOBIERNO DI ARUBA A ENTREGA E LANDSBESLUIT NA TUR EMPLEADO DI KORRECTIE INSTITUUT ARUBA (KIA)**



Diahuebs mainta na Hyatt Place a tuma luga e clausura di e re-organisacion di KIA. Prome Minister Evelyn Wever-Croes hunto cu Minister Rocco Tjon tabata presente na e gran evento aki na unda a entrega e landsbesluit na tur e 170 personal di Korrektie Instituut Aruba (KIA). E reorganisacion aki a cuminsa na aña 2009 y awe, 13 aña despues a logra finalis'e. Esaki sigur no lo tabata posibel sin e determinacion di e actual Minister di Husticia Rocco Tjon cu hunto cu e team di trahadonan, Directiva di KIA, sindicatonan y Departamento di Recurso Humano a dedica na finalisa e proyecto aki. "Esaki ta otro muestra cu union ta e forza pa logra cosnan grandi", Prome Minister a expresa.

Tambe, Prome Minister, den nomber di Gobierno di Aruba a sigura e trahadonan cu nan no a wordo lubida, y cu Gobierno ta trahando duro na purba yega na un solucion pa cu e instituto importante aki.

"Mi kier gradici Departamento di Recurso Humano, sindicatonan, ex Minister di Husticia Andin Bikker cu a cuminsa cu e proyecto aki durante pandemia, Minister Rocco Tjon cu a finalisa e proyecto, y tur empleado pa nan determinacion y dedicacion pa cu esaki. E no ta facil, pero ora tin union, por logra cosnan grandi pa Aruba. Masha pabien na tur empleado cu e promocion y reorganisacion aki y cu Dios sigui guia boso den e trabou grandi cu boso ta bin ta hacienda," Prome Minister a expresa.







## MINISTER MADURO TA ATENDE REUNION DI STEERING COMMITTEE DI CARTAC NA BARBADOS

### CARTAC ta yuda Aruba cu diferente asistencia tecnico y training



E siman aki Minister Maduro di Finansa ta atende e reunion di Steering Committee of the IMF Caribbean Technical Assistance Center (CARTAC) na Barbados. CARTAC ta IMF su organisacion cu ta yuda cu asistencia tecnico y training den e region di Caribe. Na aña 2018 Aruba a bira miembro di CARTAC y desde e momento eynan Aruba su institucionan a bin ta ricibi varios asistencia tecnico y tambe training importante pa capacitacion di e personal publico.

#### CARTAC TA BRINDA DIFERENTE ASISTENCIA NA ARUBA

Por menciona cu CARTAC a yuda Departamento Economico cu e modelo macro-economico MARUBA. Na Oficina di Estadistica CBS, CARTAC a yuda cu Aruba su Cuentanan Nacional y tambe cu CBS su Estadistica di Prijs. E personal di CBS por a atende diferente seminario di CARTAC pa amplia nan conocimiento. Na Departamento di Aduana tambe CARTAC a brinda asistencia riba topiconan manera 'Performance

Management, Risk Management, Post Clearance Audit y Trusted Trader Program'. CARTAC a haci un evaluacion tambe di e funcionamiento di Departamento di Impuesto den cual a para keto na e funcion administrativo, auditoria, servicio na cliente, proceso di obheccion (bezwaar), atraso den procesa declaracion di impuesto y restitucion. Banda di esaki CARTAC a haci un evaluacion di Aruba su sistema fiscal y a asisti DIMP den e trabounan riba introduccion di un BTW pa Aruba. Na Departamento di Finansa DF, CARTAC ta yuda cu scenario pa refinancia e debe di COVID-19 traha cu Hulanda, y cu planificacion fiscal den cual ta mehora e proceso presupuestario y ta fortifica e maneho financiero di Aruba. Personal di DF tambe a participa na varios seminario di capacitacion di CARTAC riba maneho di debe. Banco Central tambe ta ricibi asistencia tecnico di CARTAC pa por haci, entre otro, un bank stress-testing.

Aruba ta sigui apoya e trabou di CARTAC den region di Caribe Minister Maduro lo hiba palabra durante e reunion di e Steering Committee na unda lo elabora riba tur e asistencia y training cu CARTAC ta brinda na Aruba. E mandatario den nomber di Gobierno di Aruba, lo duna un 'commitment' cu Aruba lo sigui apoya e trabou importante cu CARTAC ta desplega den nos region.





# MINISTER DI CULTURA A BISHITA ALGUN MUSEO CU TA PERTENCE NA E RED CULTURAL DI EL BANCO DE LA REPUBLICA DE COLOMBIA CU TA SIGURA ACCESO LIBER NA ARTE Y CULTURA NA E PUEBLO COLOMBIANO

**Ta explora posibilidad pa financia acceso liber na arte y cultura na Aruba**



Recientemente Minister Maduro tabata na Bogota riba invitacion di Embahador di Reino Hulandes na Colombia pa haci apertura di e exposicion "20 Objetos: Una Historia de Aruba y Curazao", cu a tuma luga na Biblioteca Luis Ángel Arango. E mandatario a haci uzo di e oportunidad pa bishita algun museo cu hunto cu e Biblioteca Luis Ángel Arango ta forma parti di e red cultural di Banco de la Republica. Minister Maduro a bishita Museo di Oro y tambe e Museo di Arte Miguel Urrutia MAMU den cual tin e Museo di Botero y e exposicion 'Sanaduria, mediaciones para tejer sentidos plurales de la paz', cu ta un exposicion di e Centro de Pensamiento Pluralizar la paz di Universidad Nacional di Colombia. Na Colombia e acceso na arte y cultura ta ancla den e Constitucion y Banco de La Republica, cu ta e banco central di Colombia, ta percura pa e acceso aki atraves di nan red di biblioteca y museo. Minister Maduro a haci un bishita pa asina explora e posibilidad pa organisa y sigura e acceso na arte y cultura na Aruba na un miho manera.

Na cada museo Minister Maduro a wordo cordialmente ricibi

y a haya un recorrido y splicacion amplio. Na Museo di Oro e mandatario a combersa cu e directora sra. Maria Uribe cu a expresa e deseo cu ta biba pa hopi aña caba cerca nan pa un parti di e coleccion di Museo di Oro por wordo exhibi den Aruba su Museo Arkeologico Nacional. Na MAMU e mandatario tabata tin e placer di cera conoci cu e obranan di Fernando Botero y e coleccion priva di e artista mundialmente reconoci den cual ta figura un Picasso. E Museo di Botero tin un di e coleccionnan di arte mas importante den Latino America, cu danki na e patronahe di Banco di La Republica ta di liber acceso na publico. Na MANU tambe Minister Maduro por a bishita e exposicion Sanaduria cu ta un exposicion den cual ta explora diferente practica y sabiduria con pa yega na paz.

Ta e intencion di Minister Maduro pa explora e posibilidad pa na Aruba tambe crea e seguridad cu museonan y salanan di exposicion por bay conta cu e fondonan necesario pa asina por keda ofrece espacio pa e Pueblo di Aruba por cera conoci cu arte y biba nos cultura.





POTRETNAN DI MUSEO  
DI RED CULTURAL







## CU E DECRETO MINISTERIAL FIRMA, PROGRAMA DI SCOL SALUDABEL TA CUMINSA UN ERA NOBO

Diaranson atardi Minister Oduber tabata na Hyatt Place caminda a tuma luga e firmamento di un decreto ministerial entre Ministerio di Salud Publico, Ministerio di Enseñansa y Ministerio di Asuntonan Social. Di e manera aki a oficialmente institui e “stuurgroep” nacional di Scol Saludabel.

E programa di Scol Saludabel ta forma parti di e Plan Nacional di prevencion di malesanan no transmisibel. Minister Oduber a splica cu e plan aki ta un plan integral cu a cuminsa na aña 2020 pero a para door di e pandemia. Pero manera cu pandemia a pasa e plan nacional di prevencion a cuminsa continua mas lihe posibel.

Tres ministerio ta uni pa duna sosten financiero na un programa cu ta enfoca den crea un estilo di bida saludabel y hasi esaki pa implementa como rutina pa alumnonan y scolnan aki na Aruba.

Den e programa Scol Saludabel no solamente ta enfoca riba salud fisico pero tambe riba salud mental, movecion y bienestar total di e muchanan. Mas salud un mucha ta, mas productivo e ta den bida. Otro programa cu semper tin e sosten di Minister Oduber ta e programa di JUMP18 cu ta wordo dirigi pa dr. Busari.

Minister Oduber ta kere firmemente den campananan y programanan di prevencion. Prevencion ta e yabi pa tin un fondo di AZV cu ta keda sostenibel den futuro y pa haci esaki posibel nos mester cuminsa na nos muchanan. Actualmente tin 10 scol cu ta participando na e programa pero e meta ta pa tur scol basico y den futuro scolnan secundario tambe participa. Minister Oduber a gradici y desea tur e departamentonan cu ta bay participa na e proyecto hopi exito. E mandatario a gradici su coleganan Minister Endy Croes y Minister Rocco Tjon pa nan sosten.

Un danki na departamento di salud publico / Jeugd Gezondheids Zorg, departamento di asuntonan social, SKOA, SPCOA, IPA, DPS y GSA pa nan participacion na un manera hopi activo. Ban nos tur hunto haci e proyecto aki uno sumamente exitoso pa nos muchanan. Un pabien na e stuurgroep di Scol Saludabel cu a keda institui.

Minister Oduber ta sigur cu den futuro Aruba lo bay logra tin un comunidad mas saludabel y mas participativo cu sigur lo contribui na un desaroyo positivo pa nos pais.







## **COSTO DI TRANSPORTE Y DIFICULTADNAN LOGISTICO DISCUTI NA E "BUSINESS ROUNDTABLE" DURANTE TRADE MISSION COLOMBIA**



Transporte di productonan di Colombia pa Aruba tin su retonan pa nos comerciantenan. Mirando e importancia pa trece solucion pa esaki, durante e Business Roundtable: Cost of Transportation & Logistics, un grupo di empresario di Aruba hunto cu empresanan Colombiano di transporte y logistica a hiba discussionnan riba e retonan di transporte maritimo y aereo di productonan pa Aruba.

Jan-Willem van Bokhoven, director di Holland House a duna un introduccion riba e interes pa y importancia di fomenta mas comercio entre Aruba y Colombia. E meta di e combersacionnan tabata terce solucionan pa e retonan logistico, pa asina haci transporte di producto pa Aruba mas facil, mas barata, y mas frecuente. Esaki lo trece un beneficio grandi pa nos consumidornan.

Aruba kier accelera y engradece comercio cu Colombia. Apesar di tin solamente 110 mil habitante, Aruba ta ricibi un cantidad grandi di turista stay-over y di crucero pa aña, cu un demanda grandi pa producto y servicionan. Nos economia ta draai grandemente riba Dollar, cual cu un prijs di intercambio halto compara cu e Peso Colombiano, por ta beneficioso tambe pa companianan Colombiano inverti den Aruba.

Informacion valioso y interesante riba e proceso di transporte a keda presenta. Definitivamente tin demanda grandi pa



productonan di Colombia for di Aruba, pero lo rekeri cooperacion entre importadornan di Aruba hunto cu Gobierno di Aruba pa por logra palabracionnan mas beneficioso pa ambos importador y exportador.

Minister Geoffrey Wever a concorda hunto cu Camara di Comercio pa nan lidera e combersacionnan entre empresanan local, pa mira ki "draagvlak" tin pa coopera hunto riba importacion. E tamaño di nos mercado ta trece retonan manera volumen y consistencia pero e boluntad tey pa trece solucionan factibel.

Minister Wever ta kere firmemente cu si logra crea cierto palabracionnan entre importadornan local, y cu esfuerzo di Gobierno di Aruba pa mehora algun retonan logistico, lo por berdaderamente haci un diferencia positivo riba e prijs di productonan, y asina tambe e costo di bida pa nos ciudadanonan.



## Minister Geoffrey Wever:

# MINISTER GEOFFREY WEVER A REUNI CU EMBAHADOR HULANDES DI REPUBLICA DOMINICANA

Diamars 30 di mei, minister di asuntonan economico, comunicacion y desaroyo sostenibel, Sr. Geoffrey Wever tabata tin un reunion ameno hunto cu embahador di Reino Hulandes na Republica Dominicana, esta S.E. Frank Keurhorst.

Entre otro a combersa riba temanan economico, manera e relacion di comercio entre Santo Domingo y Aruba. Tambe a elabora riba e Trade Mission di Colombia cual recientemente a tuma luga, y e rol importante cu e embahada di Reino Hulandes a hunga den haci esaki un exito.

Relacionnan bilateral ta keda importante, y mester mantene cooperacion saludabel entre paisnan bisiña. Aruba riba su mes como un pais chikito ta hopi dependiente di otro paisnan pa comercio. Aunke Republica Dominicana ta mas grandi y tin mas tereno cu Aruba, e tambe tin su retonan y tambe ta dependiente di producto y servicionan for di afo, como tambe dependiente riba su mercado di turismo.

Minister Geoffrey Wever ta contento cu e bishita di embahador Keurhorst, y ta habri pa traha hunto cu embahada di Reino Hulandes unda ta posibel pa mehora lasonan comercial, y



resolve cualkier retonan di logistica cu por existi, pa asina promove comercio y nos comerciantenan mas den exterior y a cuminsa papia cu e proximo trade mission por ta pa Republica Dominicana.

## DUCAPRO A PRESENTA UN PLAN PA PROMOVE E INDUSTRIA CREATIVO Y PROTEHA E ARTISTANAN

Den un reunion diaranson 31 di mei, minister Geoffrey Wever a ricibi un presentacion for di Dutch Caribbean Performance Rights Organization (DUCAPRO) riba e posibilidadnan pa fomenta un Creative Music Industry mas vibrante na Aruba. Dirigi pa Sr. mr. David Kock, DUCAPRO ta un organisacion cu su meta ta pa fomenta un industria creativo mas lucrativo pa e artistanan, door di proteha nan propiedad intelectual mas activamente.

Parti di e maneho economico ta pa promove e promising sectors, pa cual e creative industry ta forma parti di dje. E industria creativo ta importante pa proteha y promove esnan cu activamente ta creativo den e industria aki. Na Aruba ta un di e tiki luganan na mundo caminda no conoce e norma di paga artistanan (creador di arte, musica) pa e derecho di uza nan creacion. DUCAPRO a mustra riba posibilidadnan economico si por "monitize" e artenan creativo pa asina sostene e porvenir di e artistanan.

Minister Geoffrey Wever a gradici sr. David Kock y su yiu homber pa tuma e tempo pa duna Ministerio di Asuntonan Economico e presentacion aki.







## MINISTER ENDY CROES TA FELICITA COLEGIO ARUBANO CU A TITULA CAMPEON DEN VOLLEYBALL C MUCHA MUHE DI WEGANNAN ESCOLAR 2023

Diaranson atardi, den un encuentro interesante a tuma luga final di Volleyball C Mucha Muhe na Compleho Deportivo Frans Figaroa. Na prome luga a keda Colegio Arubano, sub campeon a sali Colegio San Augustin, na tercer luga Colegio Santa Filomena y na di cuater luga La Salle College.

Minister Endy Croes ta desea tur scol cu ta participando den e competencia di Weganan Escolar 2023 hopi exito. Alabes

ta invita henter Pueblo di Aruba pa bin duna sosten na nos mucha- y hobennan den diferente disciplina durante e dianan binidero. Alabes Minister Endy Croes ta invita pueblo di Aruba pa e clausura di Weganan Escolar 2023 cu ta tuma luga dia 9 di juni cuminsando pa 5:30 PM na Joe Laveist Sport Park na San Nicolas. Tambe, pa e competencia di Baile Deportivo y Cultural cu ta tuma luga di 10 di juni pa 5:00 PM na Aruba Entertainment Center na Dakota.



# COMPETENCIA DI WEGANAN ESCOLAR 2023

## A CONTINUA

Diamars atardi, Weganan Escolar a continua na Compleho Deportivo Frans Figaroa den e disciplina di Futbol B Mucha Homber. Ganado di poule A: Colegio Sagrado Curason y ganado den poule C: St. Fransiscus College. Ambos scol a clasifica pa e final cu ta tuma luga dia 8 di juni. Den poule B tin un empate entre Cacique Macuarima School y Pius X School y diahuebs awo, dia 1 di juni ta bay hunga un wega di desempate pa determina e scol ganado di poule B. Durante e dianan binidero tin mas competencia entre e scolnan preparatorio, scol basico y scol secundario.

Minister di Enseñansa y Deporte Endy Croes ta desea tur scol cu ta participando den e competencia di Weganan Escolar 2023 hopi exito. Alabes ta invita henter Pueblo di Aruba pa bin duna sosten na nos mucha- y hobennan den diferente disciplina durante e dianan binidero. Alabes Minister Endy Croes ta invita pueblo di Aruba pa e clausura di Weganan Escolar 2023 cu ta tuma luga dia 9 di juni cuminsando pa 5:30 PM na Joe Laveist Sport Park na San Nicolas. Tambe, pa e competencia di Baile Deportivo y Cultural cu ta tuma luga di 10 di juni pa 5:00 PM na Aruba Entertainment Center na Dakota.





# MINISTER ENDY CROES TA DESEA SV DAKOTA HOPI EXITO DEN E CAMPEONATO DI CONCACAF CARIBBEAN CLUB SHIELD 2023 NA AUGUSTUS



Minister Endy Croes a reuni cu Sr. Gilmar Croes, Sr. Carl Michael Bikker y abogado Sr. Rossi Marchena. Durante e reunion a trece e peticion dilanti ekipo di futbol SV Dakota haya sosten pa e biahe na augustus di e aña aki. Manera ta conoci, SV Dakota-Division di Honor a titula campeon den e Campeonto di Futbol 2021-2023 di Aruba. Pa e motibo aki, SV Dakota ta biahando augustus binidero na Saint Kitts pa e campeonato di CONCACAF Caribbean Club Shield 2023, unda cu e ekipo campeon di 16 diferente isla den Caribe lo competi contra otro.

Basa riba esaki, CONCACAF tin basta reglamento e.o. momento cu un ekipo di futbol representa nan pais, nan ta cubri costo di p.e. estadia, alimentacion, seguro y gran parti di e ticketnan. Ademá, tin cierto condicion cu e ekipo cu ta participa tin cu cumpli cu ne, pa e motibo aki SV Dakota a acerca Ministerio



di Deporte pa busca sosten pa por representa Aruba den e campeonato di CONCACAF Caribbean Club Shield 2023. Tambe, a dialoga brevemente di e derayonan en general di SV Dakota. Minister Endy Croes ta desea ekipo di SV Dakota hopi exito den e campeonato na Saint Kitts augustus binidero.





## MINISTER ENDY CROES TA FELICITA SRA. CLEMENTIA EUGENE CU SU INVESTIGACION RELACIONA CU ABUSO DI MUCHA



Sra. Clementia Eugene ta Interim Program Manager di Departamento di Trabou y Desaroyo Social (Department of Social Work and Development) na Universidad di Aruba. 15 di mei ultimo, Dia Internacional di Famia, Sra. Eugene a presenta na Minister di Enseñansa y Deporte Sr. Endy Croes, Minister di Asunto Social y Husticia Sr. Rocco Tjon y directora di Departamento

di Asunto Social Sra. Rosanna van Dijk e resultadonan di su investigacion titula: Child Maltreatment Prevalence Rate in Aruba.

Sra. Eugene a informa cu e resultadonan di e estudio ta revela un promedio di abuso a lo largo di bida di 78.4%. Esaki ta nifica cu 8 di cada 10 mucha na Aruba ta experiencia abuso den nan bida. Tambe, e resultado a indica cu mas mucha muhe ta experiencia abuso cu mucha homber. Durante e presentacion, Sra. Eugene a duna Gobierno di Aruba diferente recomendacion cu por aplica pa garantisca proteccion, sobrevivencia, evolucion di capacidad humano y florecemento di mucha. Un di e recomendacionnan cu a duna ta pa tin trahado social na tur scol di Aruba, cuminsando den scol preparatorio. A recomenda pa incorporaCodigo di Proteccion y Señal di Siguridad na Instituto Pedagogico Arubano (IPA), den Programa di Trabou Social (Social Work Programs) na EPI y Universidad di Aruba. Minister Endy Croes ta felicita Sra. Eugene cu e investigacion amplio cu el a haci encuanto abuso di mucha. Esaki sigur lo



contribui na e maneho y lo yuda Gobierno di Aruba momento cu mester tuma decisionnan esencial.

Tur esnan cu ta desea di haya un copia di e resumen di e investigacion na Hulandes, Ingles, Spaño of Papiamentu por mail Sra. Eugene na [clementia.eugene@ua.aw](mailto:clementia.eugene@ua.aw) pa ricibi un copia.



# ARUBA CU PRESENTACION RIBA TURISMO NA EMBAHADOR DI KAZACHSTAN



Director di ATA Europa Tirso Tromp a duna un presentacion riba Aruba como destinacion turistico na embahador Askar Zhumagaliyev di Kazachstan. Tambe presente tabata Minister Plenipotenciario mr. Ady Thijsen,

E presentacion aki a sali for di e combersacion cu Minister Thijsen tabata tin cu embahador Zhumagaliyev unda e embahador a indica cu Aruba por ta un destinacion potencial pa turismo for di Kazachstan y pesey elo ta interesa pa haya un presentacion pa papia esaki cu e autoridadnan riba e tereno di turismo na Kazachstan. Embahador Zhumagaliyev a bisa cu Kazachstan ta e pais den Central Asia cu economicamente ta hopi mas fuerte. Esey ta trece cune cu e promedio di habitante di Kazachstan cu por viaha, ta buscando destinacionnan mas leu cu loke ya caba nan conoce por ehempel Singapore y Dubai. Actualmente tin turista for di Kazachstan cu ta bishita Republica Dominicana. Aruba sigur por ta un opcion pa loke e turista aki ta busca.

Sr. Tromp den su presentacion a elabora riba kico Aruba ta brinda como destinacion turistico. E atraccion mas grandi di Aruba cu ta su playanan y su hendenan amical y servicial. Tambe cu Aruba tin un bon infraestructura pa loke ta un aeropuerto sofistica, bon carater y Aruba ta "safe". Ela repasa tambe riba e contrast por ehempel entre e costa zuid, cu awa calmo y e costa nort di Aruba, cu laman mas bruto. Tambe sr. Tromp a mustra riba e diferencia den e ciudad Oranjestad y San Nicolas. Banda di a ilustra e producto turistico di Aruba, Sr. Tromp a duna tambe un bista riba e factor cu turismo ta hunga den e economia y GDP di Aruba. Tambe con Aruba a bin ta recupera for di e pandemia y cu te ainda e mercado Mericano ta forma casi 80 por ciento di tur e turistanan cu ta bishita Aruba.



Embahador Zhumagaliyev a gradici Tirso Tromp pa e bunita presentacion y a bisa cu awor lo mester bai na traha pa interesa e turista for di Kazachstan pa bishita Aruba. Pero prome lo mester traha riba un punto cardinal pa logra esaki, cu ta e connexion aereo entre Kazachstan y Aruba. Embahador Zhumagaliyev a bisa cu na e momento aki tin unicamente vuelo di Air Astana pa Amsterdam desde Aqtau, cu ta un ciudad hopi chikito cu principalmente ta drei rond di e industria petrolero. Pa interesa turismo for di Kazachstan pa Aruba lo ta mas factibel si tin un connexion cu Almaty, cu ta e ciudad mas grandi di Kazachstan cu mas cu 2 milyon habitante.

Minister Thijsen a bisa cu e ta mira aki un oportunidad grandi pa KLM cu via Schiphol por hiba e turista for di Kazachstan Aruba y lo ta bon pa toca e tema aki riba nivel gubernamental. Tambe lo interesante si na nivel di aeropuerto y aerolinea papia riba e posibilidad aki.





# CONFERENCIA DI PRENSA HUBENIL

## EDICION #2



Bo kier ta un Periodista  
pa un dia?

y haci bo pregunta  
na Minister President  
personalmente?

Si esaki ta algo cu bo ta haya great,  
skirbi aki bou cua ta e 3 preguntanan cu ABO  
lo kier puntra sra. Evelyn Wever-Croes



1



2



3

Durante luna di juni, cada diabierna 4 mucha lo wordo invita na Bestuurskantoor pa  
por haci nan preguntanan na Prome Minister. Cada siman, un periodista lo papia cu  
e muchanan tocante e trabou di periodismo. Dia 7 di juli lo trece tur e 20 muchanan  
hunto pa e ultimo conferencia di prensa hubenil, edicion #2.



Scol:

Klas:

Number:

Edad:

Registra na e link: <https://forms.office.com/r/kXrNkVcebg>



Union ta importante pa cualkier sociedad pasobra e ta e base di forsa, poder, guia, curashi y desaroyo. Union ta provee un fuente constante di motivacion positivo y e ta e vinculo pa logronan grandi. Esey ta loke Aruba a demostra, den union y cu positivismo a logra recuperacion despues di varios crisis tras di otro.



2023

AÑA DI UNION Y POSITIVISMO! \_\_\_\_\_